

Gaji: PM minta sokongan ahli Umno

30 SEP 1989

KUALA LUMPUR, Ahad — Datuk Seri Dr Mahathir Mohamad meminta kakitangan kerajaan yang menjadi ahli Umno supaya menunjukkan kesetiaan mereka kepada parti dengan menyokong tindakan kerajaan menghadapi ugutan Cuepacs mengenai tuntutan gaji.

Katanya, kerajaan tetap dengan pendiriannya tidak akan tunduk kepada ugutan Cuepacs kerana kerajaan juga bertanggungjawab kepada semua lapisan rakyat dalam menghadapi kemelesetan ekonomi negara sekarang.

"Kerana tekanan kemelesetan ini jugalah, menteri-menteri sanggup memotong gaji mereka setiap bulan sejak tahun 1982. Bukanlah tujuan kami menunjukkan, tetapi semata-mata didesak oleh keadaan," katanya ketika menggulung perbahasan hari terakhir Perhimpunan Agung Umno ke-36 di sini, hari ini.

Menurut Perdana Menteri, kerajaan juga mesti memikirkan masalah yang dihadapi oleh petani, nelayan dan peniaga

kecil yang tidak terjamin pendapatannya.

"Seorang penjual mi yang mengeluarkan modal membeli perkakas mi belum tentu akan mendapat keuntungan. Kalau hujan turun, tentulah pendapatannya kurang atau tidak berpendapatan langsung. Begitu jugalah nasib petani dan nelayan.

"Tetapi, bagi kakitangan kerajaan, sama ada hujan atau tidak, ribut atau tidak, setiap bu-

lan mereka pasti menerima gaji. Amatlah tidak wajar jika kerajaan terpaksa menggunakan wang pembangunan untuk golongan itu bagi membayar gaji yang lebih tinggi kepada kakitangan kerajaan," katanya.

Perdana Menteri menegaskan, dalam keadaan sekarang, kedudukan kakitangan kerajaan lebih terjamin berbanding rakan mereka di sektor swasta dan petani atau nelayan.

"Walaupun kerajaan berhasrat mengurangkan subsidi kepada petani dan nelayan, kerajaan tidak bercadang memotong gaji kakitangannya.

"Kerajaan juga tidak akan memberhentikan kakitangannya walaupun mengalami kesempitan wang, sedangkan baru-baru ini kira-kira 1,200 pekerja di Pulau Pinang diberhentikan kerana syarikat mereka mengalami masalah," tambahnya.

Berunding

Perdana Menteri menegaskan, sukar bagi beliau menemui pemimpin-pemimpin kesatuan sekerja yang mengugut beliau dan kerajaan.

"Pada 1 Oktober ini, mereka akan mengadakan piket. Macam mana saya hendak berjumpa dengan mereka yang mengacu pistol ke kepala saya. Jika hendak berunding, ketepikan dulu ugutan itu.

"Tidak mengapalah kalau mereka tidak menyokong kita kerana kita tahu petani, nelayan dan peniaga kecil masih menyokong kita," katanya.

Perdana Menteri menjelaskan sekali lagi bahawa kerajaan telah menaikkan gaji kakitangan rendah sejajar dengan dasarnya memberi keutamaan kepada kakitangan kumpulan itu.

Dengan kenaikan itu, pendapatan pekerjaan bergaji rendah sektor kerajaan menjadi jauh lebih tinggi daripada gaji rakan mereka di sektor swasta.

Malah, katanya melalui dasar penswastaan, kerajaan memberi jaminan bahawa mereka akan memperolehi tidak kurang daripada apa yang mereka terima sekarang.